

## SKUPŠTINA HERCEGOVAČKO- NERETVANSKOG KANTONA

193

Na osnovu člana 39. Ustava Hercegovačko-neretvanskog kantona („Službene novine HNK“ br. 2/98, 3/98, 4/00 i 7/04), Skupština Hercegovačko-neretvanskog kantona, na sjednici održanoj dana 04.05.2017. godine je donijela

### ZAKON O ORUŽJU I MUNICIJI U HERCEGOVAČKO- NERETVANSKOM KANTONU

#### DIO PRVI – OSNOVNE ODREDBE

##### Član 1.

(Predmet Zakona)

Ovim Zakonom propisuju se uslovi za nabavljanje, držanje, nošenje, sakupljanje, popravljanje i prepravljanje, oduzimanje oružja i municije, promet oružja i municije, način postupanja sa oružjem i municijom, osnivanje i vođenje civilne streljane i evidencije o oružju i municiji na teritoriji Hercegovačko-neretvanskog kantona ( u dalnjem tekstu: Kantona).

##### Član 2.

(Primjena)

(1) Fizička i pravna lica mogu nabavljati, držati i nositi oružje i municiju samo po odredbama ovog Zakona.

(2) Odredbe ovog Zakona u pogledu nabavljanja, držanja i nošenja oružja i municije odnose se i na strane državljane sa stalnim boravkom na teritoriji Kantona.

(3) Odredbe ovog Zakona ne odnose se na pripadnike agencija, organa i institucija u Bosni i Hercegovini, koji nabavljaju i nose oružje i municiju u skladu sa propisima, a djeluju na teritoriji Kantona.

##### Član 3.

(Svrha Zakona)

Svrha donošenja ovog Zakona je uskladivanje propisa iz oblasti nabavljanja, držanja i nošenja oružja sa Direktivom Vijeća Europe 91/477/EEZ od 18.6.1991. godine o kontroli nabavljanja i držanja oružja (SL L 256, 3.9.1991.) i Direktivom 2008/51/EZ Europskog parlamenta i Vijeća od 21.5.2008. godine kojom se mijenja i dopunjuje Direktiva Vijeća

91/477/EEZ o kontroli nabavljanja i držanja oružja (SL L 179, 8.7.2008.).

##### Član 4.

(Definicije)

(1) Oružje u smislu ovog Zakona je naprava izrađena ili prilagođena da pod pritiskom zraka, barutnih i drugih plinova ili drugog potisnog sredstva može izbaciti zrno, kuglu, sačmu ili neki drugi projektil, odnosno raspršiti plin ili tečnost, te druge naprave koje su namijenjene za samoodbranu, lov ili sport.

(2) Pojedini pojmovi upotrijebljeni u ovom Zakonu imaju sljedeća značenja:

- a) „vatreno oružje“ su sve vrste pušaka, pištolja i revolvera, kao i sve vrste naprava koje pod pritiskom barutnih plinova izbacuju kroz cijev zrno, kuglu, sačmu ili druge projektile;
- b) „automatsko oružje“ je oružje kod kojeg je jednokratnim pritiskom na obarač moguće ispaliti više metaka odnosno oružje koje se automatski puni nakon svakog ispaljivanja i koje može ispaliti više puta jednim pritiskom na obarač;
- c) „poluautomatsko oružje“ je oružje koje je nakon ispaljivanja svakog metka ponovno spremno za ispaljivanje i kod kojeg je iz cijevi jednokratnim pritiskom obarača moguće ispaljivati jedan metak;
- d) „oružje s repetirajućim mehanizmom“ je oružje kod kojeg je nakon ispaljivanja svakog metka potrebno ručno pomoći mehanizma ubaciti metak u cijev;
- e) „oružje za jedinačnu paljbu“ je oružje bez spremnika-magacina koje se svaki put prije ispaljivanja metka puni ručno ubacivanjem metka u ležište cijevi ili ležište punjenja koje se nalazi na kraju cijevi;
- f) „vatreno oružje kratke cijevi“ je oružje čija cijev nije duža od 30 cm, a ukupna dužina ne prolazi 60 cm;
- g) „vatreno oružje duge cijevi“ označava oružje čija dužina cijevi prelazi 30 cm, odnosno oružje čija ukupna dužina sa cijevi prelazi 60 cm;
- h) „vazdušno oružje“ su sve vrste pušaka, pištolja, revolvera i druge naprave koje pod pritiskom zraka izbacuju kroz cijev zrno, dijabolu, kuglicu ili druge projektile;
- i) „gasno oružje“ su puške, pištolji i revolveri i druge naprave koje pod pritiskom barutnih plinova ili sabijenog plina raspršuju nadražljive materije;

- j) „oružje za signalizaciju“ su pištolji, revolveri, puške i druge naprave koje pod pritiskom energije barutnog punjenja ispaljuju naboј namijenjen isključivo za izazivanje glasnog pucanja ili ispaljivanju svjetleće signalne zvjezdice;
- k) „hladno oružje“ su bodeži, kame, mačevi, sablje, bajoneti i skakavci čije se sjećivo nalazi pod pritiskom sabijene opruge, a iz drške iskaču pritiskom na dugme ili polugu ili metalne zvjezdice za bacanje, bez obzira na dužinu oštice, bokseri, buzdovani, te drugo oružje sa skrivenom oštricom kao i drugi predmeti kojima je osnovna namjena napad;
- l) „oružje s tetivom“ su lukovi, samostreli i druge naprave koje snagom napete tetine ili druge elastične materije potiskuju strjelu ili drugi projektil;
- m) „lovačko oružje“ je vatreno oružje kategorije B sa kojim se smije loviti divljač u skladu sa propisima o lovstvu;
- n) „sportsko oružje“ je vatreno oružje kategorije B, vazdušno oružje i oružje s tetivom koje se upotrebljava za sportske discipline u skladu sa posebnim propisima;
- o) „trofejno oružje“ je vatreno, vazdušno i hladno oružje koje se čuva kao uspomena ranijeg perioda historije ili za njegovog vlasnika predstavlja ličnu ili porodičnu uspomenu, a koje je od strane ovlaštene organizacije ili ovlaštenog pojedinca trajno onesposobljeno za upotrebu;
- p) „staro oružje“ je hladno i vatreno oružje koje ima historijsku vrijednost, oružje koje čini sastavni dio narodne nošnje, kao i vojno i policijsko oružje koje je dotrajalo i neupotrebljivo, oružje koje je sastavni dio vojnih i policijskih paradnih uniformi, oružje koje se puni s usta cijevi crnim barutom, a pali kremenom, fitiljem ili kapislom i koje je od ovlaštene organizacije ili ovlaštenog pojedinca trajno onesposobljeno za upotrebu;
- r) „oružje za ličnu sigurnost“ čine pištolji i revolveri iz člana 4. stav (2) tačke a) ovog Zakona, kalibra 4,8 mm i veći;
- s) „električni paralizatori“ su ručne naprave koje pomoću visokog električnog napona privremeno onesposobljavaju osobu;
- t) „sprej za omamljivanje“ je naprava kojom se usmjereno izbacuju u vidu mlaza ili pjene neškodljive nadražljive tvari za onesposobljavanje pojedinaca i koje na ljudsko zdravlje imaju kratkotrajan učinak;
- u) „mužari-prangije“ su ručne ili samostojeće naprave namijenjene za izazivanje glasnog pucnja, koje su konstruisane tako da ne mogu primiti cijeloviti naboј, pune se s usta cijevi određenom količinom crnog baruta i pale štapinom, kremenom i kapislom, a zatvaraju sredstvom male specifične težine;
- v) „reprodukciјe oružja“ su kopije dugog i kratkog vatrenog oružja, koje se pune s usta cijevi crnim barutom i pale fitiljem, kremenom ili kapislom;
- z) „imitacija oružja“ su predmeti koji su vanjskim izgledom slični ili jednaki oružju, ali ih nije moguće upotrijebiti niti prepraviti u vatreno oružje;
- aa) „dekorativno oružje“ je oružje koje je izrađeno u dekorativne svrhe i nije ga moguće upotrijebiti ili prepraviti u vatreno oružje;
- ab) „bitni dijelovi oružja“ su: cijevi s ležištem metka, ulošci-adapteri za vatreno oružje s olučenim i neolučenim cijevima, zatvarači, navlake, bubanj kod revolvera i rukohvati s mehanizmom za okidanje;
- ac) „municija“ je punjenje za vatreno oružje;
- ad) „municija za vatreno oružje“ je cijeloviti metak koji sjediniuje čahuru, kapislu, barutno punjenje i zrno ili sačmu;
- ae) „lažna municija“ je municija bez oštrog ili ubojitog naboja kojom se postiže učinak pucanja;
- af) „municija s prodirućim zrnima“ je municija namijenjena za vojnu upotrebu kod kojeg se zrno nalazi u čahuri i ima prodiruće tvrdo jezgro;
- ag) „municija s eksplozivnim zrnima“ je municija za vojnu upotrebu kod kojeg zrno sadrži punjenje koje eksplodira pri udaru;
- ah) „municija sa zapaljivim zrnima“ je municija za vojnu upotrebu kod kojeg zrno sadrži hemijsku smjesu koja se zapali pri kontaktu sa zrakom ili na udar;
- ai) „minsko eksplozivna sredstva“ su sve vrste bombi, mina, granata i drugih naprava opremljenih s eksplozivnom materijom ili detonatorom (težina, udar, potez, trenje, hemijska reakcija, električna energija i sl.) kod kojih dolazi do oslobođanja energije i njihovog rasprskavanja;
- aj) „optički nišan“ je naprava kojom se oružju povećava preciznost;
- ak) „civilno strelište“ je objekt namijenjen sportsko-rekreativnom gađanju koji ispunjava tehničke i sigurnosne uslove za upotrebu registrovanog ili prijavljenog oružja;

- al) „onesposobljavanje vatreng oružja“ je onesposobljavanje svih bitnih dijelova oružja na način da njihovim uklanjanjem, zamjenom ili izmjenom ne može biti omogućeno njegovo osposobljavanje;
- am) „popravljanje oružja“ je otklanjanje kvarova na oružju i zamjena ili ugradnja originalnih dijelova;
- an) „prepravljanje oružja“ je prilagođavanje oružja drugoj municipiji, zamjena ili ugradnja bitnih dijelova oružja i drugi zahvati na oružju kojima se utiče na njegovo funkcionisanje ili na tehnička svojstva;
- ao) „prenošenje oružja“ je premještaj oružja, za koje je izdat oružni list, s jednog mesta na drugo;
- ap) „promet oružja i municije“ je nabavljavanje oružja i municije radi prodaje, smještaj i čuvanje oružja i municije u svrhu prodaje, prodaja oružja i municije na malo i veliko u Kantonu;
- ar) „posebna oprema za vatreno oružje“ je svaki mehanizam namijenjen kao dodatak za model oružja, čijom primjenom se mijenjaju mogućnosti kod upotrebe oružja, izuzev optičkog nišana;
- as) „registrovano oružje“ je oružje za koje je izdata odgovarajuća isprava o oružju;
- at) „registracija oružja“ je unos podataka o oružju i vlasniku, odnosno korisniku oružja u službene evidencije propisane ovim Zakonom, kao i propisima donesenim na osnovu ovog Zakona, uz izdavanje odgovarajuće isprave;
- au) „vlasnik oružja“ je fizičko ili pravno lice kojem je izdata odgovarajuća isprava o oružju;
- av) „ovlašteni trgovac oružjem“ je pravno lice ili poduzetnik koje posjeduje odobrenje nadležnog organa za bavljenje prometom oružja i municije.

### Član 5.

#### (Izuzetci od primjene Zakona)

U smislu ovog Zakona ne smatra se oružjem:

- a) dekorativno oružje;
- b) imitacija oružja;
- c) oružje koje je trajno onesposobljeno za upotrebu tehničkim postupcima koji su određeni posebnim propisima;
- d) oružje koje je namijenjeno za alarmiranje, signalizaciju, spašavanje života i usmrćivanje životinja;
- e) podvodne puške i drugi predmeti koji snagom opruge, napete gume ili sabijenog plina izbacuju osti ili harpun koji su isključivo namijenjeni ribolovu;

- f) oružje koje se koristi u industrijske ili tehničke svrhe pod uslovom da može biti korišteno samo za te navedene svrhe;
- g) municija za vazdušno oružje;
- h) municija za oružje s tetivom i lažna municija.

### DIO DRUGI – ORUŽJE I MUNICIJA

#### POGLAVLJE I. KATEGORIZACIJA ORUŽJA

##### Član 6.

###### (Kategorizacija oružja)

(1) Oružje se, prema ovom Zakonu, razvrstava u četiri kategorije.

- (2) Oružje kategorije A, su:
  - a) eksplozivni vojni projektili i bacači;
  - b) automatsko vatreno oružje;
  - c) vatreno oružje koje je kamuflirano tako da izgleda kao neki drugi predmet;
  - d) municija sa probojnim, eksplozivnim, obilježavajućim ili zapaljivim projektilima, te projektili za takvu municiju;
  - e) municija za pištolje i revolvere s projektilom koji ima efekat širenja i projektili za takvu municiju, osim municije za lov ili sportsko streljaštvo za lica kojima je dopušteno da koriste to oružje;
  - f) minsko-eksplozivna sredstva i njegovi dijelovi;
  - g) oružje koje je izrađeno ili prerađeno bez odobrenja za promet oružjem, osim oružja iz kategorije C tačka c) i tačka b) kategorije D;
  - h) poluautomatsko vatreno oružje za civilnu upotrebu, koje po svom autentičnom izgledu odgovara automatskom oružju;
  - i) ostalo vatreno oružje koje nije obuhvaćeno kategorijama B, C ili D;
  - j) posebna oprema za vatreno oružje;
  - k) sve vrste oružja s integralnim prigušivačima, prigušivači namijenjeni oružju i djelovi za prigušivače.
- (3) Oružje kategorije B, su:
  - a) poluautomatsko ili repetirajuće vatreno oružje kratke cijevi;
  - b) jednostrijelno kratkocijevno oružje sa središnjom udarnom iglom;
  - c) jednostrijelno kratkocijevno oružje s rubnim paljenjem ukupne dužine do 28 cm;
  - d) poluautomatsko dugocijevno vatreno oružje koje zajedno sa magacinom i ležištem može primiti više od tri metka odnosno naboja;
  - e) poluautomatsko vatreno oružje duge cijevi sa magacinom i ležištem za najviše tri metka, kod kojeg se magacin, odnosno opruga za punjenje

- može skinuti, odnosno nije sigurno je li oružje napravljeno tako da se uz obični alat može prepraviti u oružje sa magacinom i ležištem za više od tri metka;
- f) repetirajuće i poluautomatsko vatreno oružje duge cijevi s glatkim cijevi ukupne dužine do 60 cm;
- g) repetirajuće vatreno oružje duge cijevi koje nije obuhvaćeno tačkom f);
- h) vatreno oružje duge cijevi za jedinačnu paljbu s jednom ili više uzlijedbenih cijevi;
- i) vatreno oružje duge cijevi za jedinačnu paljbu s jednom ili više glatkih cijevi;
- j) poluautomatsko vatreno oružje duge cijevi koje nije obuhvaćeno tačkama d), e), f) i g) ove kategorije;
- k) streljivo trofejsko oružje;
- l) jedinstveno dugocijevno oružje s kompozitnim glatkim i uzlijedbenim cijevi.
- (4) Oružje kategorije C, su:
- glinski oružje;
  - repetirajuće vatrenog oružja kod kojeg se ne upotrebljava električni napajanj;
  - streljivo;
  - vezdiljivo oružje u kojem energija je 10,5 J ili veća i u kojem je brzina 200 m/s ili veća;
  - oružje u kojem je brzina veća od 450 m/s;
- (5) Oružje kategorije D, su:
- vezdiljivo oružje u kojem je energija manja od 10,5 J ili u kojem je brzina manja od 200 m/s i kojem je:
  - oružje s udaricom manje od 450 N;
  - električni poslužitelj;
  - raspršivači;
  - hladno oružje.

(1) Oružje iz clana 1.

prava i obveza vlasnika:

- Zabranjeno oružje:

  - oružje kategorije A;
  - hladno oružje kojem je:
  - ili nanošenje oružju;
  - hladno oružje koju je:

b) Dozvoljeno oružje za koje nema odgovarajuća isprave:

c) Dozvoljeno oružje za koje nema:

nadležnoj organizacijskoj jedinici Uprave policije - oružje kategorije C.

d) Dozvoljeno oružje za koje nije potrebno odobrenje niti prijava nadležnoj organizacijskoj jedinici Uprave policije - oružje kategorije D.

(2) Zabranjeno je nabavljanje, držanje ili nošenje oružja kategorije A.

(3) Zabranjeno je nabavljanje, držanje ili nošenje oružja kategorije B bez odgovarajuće isprave o oružju.

(4) Zabranjeno je nabavljanje, držanje ili nošenje oružja kategorije C bez odgovarajuće isprave o oružju.

(5) Oružje kategorije D mogu nabavljati, držati i nositi lica starija od 18 godina.

## POGLAVLJE II. NABAVLJANJE ORUŽJA I MUNICIJE I ISPRAVE O ORUŽJU

### Član 8.

(Isprave)

(1) Isprave o oružju prema ovom Zakonu su:

- odobrenje za nabavljanje oružja;
- oružni list za držanje oružja;
- oružni list za držanje i nošenje oružja;
- odobrenje za držanje oružja;
- potvrda o prijavi oružja kategorije C;
- odobrenje za sakupljanje i držanje starog oružja;
- odobrenje za držanje trofejnog oružja.

(2) Kao isprave o oružju, u smislu ovog Zakona, važe sve isprave o oružju koje su izdate od nadležnih organa na teritoriji Bosne i Hercegovine.

### Član 9.

(Zahtjev)

(1) Zahtjev za izдавanje odobrenja za nabavku oružja podnosi se na propisanom obrascu nadležnoj organizacijskoj jedinici Uprave policije prema mjestu prebivališta, odnosno sjedišta podnositelja zahtjeva (u daljem tekstu: nadležni organ), Ministarstva unutrašnjih poslova Hercegovačko-neretvanskog kantona (u daljem tekstu: ministarstvo).

(2) Obrazac zahtjeva za izдавanje odobrenja za nabavku oružja utvrđuje se pravilnikom.

### Član 10.

(Odobrenje za nabavljanje oružja fizičkom licu)

(1) Nadležni organ izdaje fizičkom licu odobrenje za nabavku oružja ukoliko ispunjava opšte i posebne

pravilnici za izдавanje odobrenja za

držanje oružja fizičkom licu su da:

1) fizičko lice do 18 godina života;

2) fizičko lice u voljno

## Hercegovačko-neretvanskog kantona

- b) ima opravdani razlog za nabavljanje oružja;
- c) nije osuđivano za krivično djelo ili da se protiv lica ne vodi krivični postupak, izuzev za krivična djela bezbjednosti javnog saobraćaja;
- d) nije kažnjavana za prekršaj protiv javnog reda i mira, prekršaj propisan Zakonom o oružju i municiji ili nasilje predviđeno drugim zakonom, kao i da se protiv tog lica ne vodi postupak za takve prekršaje;
- e) ne postoje okolnosti koje negativno utiču na javni red i mir, odnosno interesu bezbjednosti;
- f) ne postoje druge okolnosti koje ukazuju da bi oružje moglo biti zloupotrebljeno, kao što je: prekomjerno uživanje alkohola, konzumacija opojnih droga ili drugih omamljujućih sredstava, izraženo poremećeni porodični odnosi, sukobi s okolinom, agresivno i ekscesno ponašanje i drugi poremećaji u ponašanju, kriminalističko-obavještajni razlozi i razlozi koji ukazuju na povezanost s licima iz kriminalističko-obavještajne evidencije, te drugi poremećaji u ponašanju, disciplinske mjere propisa o lovnu ili sportskom streljaštvu i slično.

(3) Posebni uslovi za izdavanje odobrenja za nabavku oružja fizičkom licu su da:

- a) je zdravstveno sposobna za držanje i nošenje oružja;
- b) raspolaže tehničkim znanjem i vještinom za pravilnu upotrebu oružja i da poznaje propise koji se odnose na držanje i nošenje oružja;
- c) ima uslove za siguran smještaj i čuvanje oružja.

(4) Izuzetno od stava (2) tačke a) ovog člana, odobrenje za nabavljanje oružja može se izdati i licu iz člana 2. stava (3) ovog Zakona, s navršenih 18 godina života za vrijeme aktivne službe i članovima sportskih streljačkih udruženja koji se aktivno takmiče u streljaštvu.

(5) Rukovodilac nadležnog organa osniva Komisiju za odlučivanje po podnesenom zahtjevu za nabavljanje, držanje i nošenje oružja i municije koja ocjenjuje opravdanost zahtjeva za nabavljanje, držanje i nošenje oružja i municije.

(6) Način rada Komisije iz stava (5) ovog člana utvrđuje se pravilnikom koji donosi ministar na prijedlog komesara.

## Član 11.

(Utvrđivanje uslova za izdavanje odobrenja za nabavljanje oružja fizičkom licu)

(1) Fizičko lice ima opravdan razlog za nabavljanje oružja ukoliko se utvrdi da je njegova lična sigurnost ugrožena ili mogla biti ugrožena u tolikoj mjeri da joj za njegovu bezbjednost potrebno

oružje ili ukoliko zbog prirode posla ili okolnosti u kojima ga obavlja postoji potreba za nabavljanjem oružja.

(2) Fizičko lice ima opravdani razlog za nabavljanje lovačkog oružja ukoliko je član lovačkog društva i ukoliko ima položen lovački ispit, što se dokazuje uvjerenjem o članstvu u lovačkom društvu koje ne može biti starije od šest mjeseci i uvjerenjem o položenom lovačkom ispitu.

(3) Fizičko lice ima opravdani razlog za nabavljanje sportskog oružja ukoliko je član sportske streljačke organizacije, što se dokazuje uvjerenjem sportske streljačke organizacije čiji je član, a koje ne može biti starije od šest mjeseci.

(4) Postojanje uslova iz člana 10. stava (2) tačke c) ovog Zakona dokazuje se na osnovu uvjerenja nadležnog suda i uvjerenja organa nadležnog za vođenje krivičnih evidencija, koje ne može biti starije od šest mjeseci.

(5) Radi utvrđivanja uslova iz člana 10. stava (2) tački b), e) i f) ovog Zakona, policijski službenik ovlašten je tražiti i prikupljati podatke i informacije o podnosiocu zahtjeva od građana, kao i od odabranog doktora porodične medicine podnosioca zahtjeva, o čemu sastavlja službenu zabilješku.

(6) Postojanje uslova iz člana 10. stava (2) tačke d) ovoga Zakona utvrđuje se provjerom u prekršajnoj evidenciji u nadležnom organu.

## Član 12.

(Dostavljanje dokaza o ispunjavanju posebnih uslova)

(1) Nadležni organ dostavlja obavijest podnosiocu zahtjeva koji ispunjava opšte uslove iz člana 10. stava (2) ovog Zakona, da u roku od 60 dana dostavi dokaze o ispunjavanju posebnih uslova iz člana 10. stava (3) tačka a) i b) ovog Zakona.

(2) U roku iz stava (1) ovog člana policijski službenik neposrednim opažanjem u stambenom i drugom prostoru gdje se oružje drži, utvrđuje postojanje uslova iz člana 10. stava (3) tačke c) o čemu sastavlja službenu zabilješku.

## Član 13.

(Dokazi o zdravstvenoj sposobnosti za držanje i nošenje oružja)

(1) Postojanje uslova iz člana 10. stava (3) tačke a) ovog Zakona podnosioc zahtjeva dokazuje uvjerenjem o zdravstvenoj sposobnosti za držanje i nošenje oružja, a lica iz člana 2. stava (3) ovog Zakona, potvrdom nadležnog organa o zaposlenju.

(2) Uvjerenje i potvrda iz stava (1) ovog člana ne mogu biti starija od šest mjeseci od dana izdavanja.

(3) Uvjerenje iz stava (1) ovog člana izdaje nadležna zdravstvena ustanova.

(4) Ministar unutrašnjih poslova na prijedlog ministra zdravstva, rada i socijalne zaštite donosi odluku kojom se imenuje komisija zdravstvenih radnika, koji su potrebni u postupku za izdavanje ljekarskih uvjerenja licima koje nabavlaju oružje i municiju.

(5) Ministar zdravstva, rada i socijalne zaštite u saradnji sa ministrom unutrašnjih poslova donosi Pravilnik o utvrđivanju zdravstvene sposobnosti za nabavljanje, držanje i nošenje oružja, kojim utvrđuje kriterije za provjeru zdravstvene sposobnosti iz člana 10. stava (3) tačke a), kao i sastav komisije, uz saglasnost sa članom 74. stav 2.

#### Član 14.

(Promjene zdravstvene sposobnosti)

Zdravstvena ustanova, doktor porodične medicine i građanin koji ima saznanja o promjeni zdravstvenog stanja vlasnika oružja, a koja može uticati na sposobnost za držanje i nošenje oružja, dužni su odmah po saznanju za takvu promjenu obavijestiti nadležni organ.

#### Član 15.

(Dokazi o tehničkom znanju i vještini za pravilnu upotrebu oružja)

(1) Ispunjavanje uslova iz člana 10. stava (3) tačke b) ovog Zakona, za oružje kategorije B podnositelj zahtjeva dokazuje potvrdom o položenom ispitu o sposobljenosti za pravilno držanje, nošenje i rukovanje oružjem.

(2) Izuzetno od stava (1) ovog člana, lice iz člana 2. stava (3) ovog Zakona, za vrijeme aktivne službe ili nakon odlaska u penziju, uslove dokazuje ispravom o zaposlenju, odnosno o prestanku radnog odnosa zbog ispunjavanja uslova za penziju.

(3) Stručna ovlaštena organizacija za obuku u rukovanju vatrenim oružjem može biti streljačka odnosno druga organizacija i ustanova koja raspolaže potrebnim prostorom, strelištem, stručnim kadrom i koja ispunjava propisane uslove za provođenje obuke i posjeduje odobrenje ministarstva.

(4) Potvrdu iz stava (1) ovog člana izdaje Komisija za provjeru znanja o pravilnom držanju, nošenju i rukovanju oružjem koju imenuje ministar na prijedlog komesara.

(5) Ministar na prijedlog komesara donosi Pravilnik o programu obuke i načinu osposobljavanja za pravilno rukovanje, držanje i nošenje oružja.

#### Član 16.

(Rješavanje o zahtjevu fizičkog lica za izdavanje odobrenja za nabavku oružja)

(1) Odobrenje za nabavku oružja izdaje se fizičkom licu koje ispunjava uslove iz člana 10. ovog Zakona.

(2) O izdavanju odobrenja iz stava (1) ovog člana odlučuje rukovodilac nadležnog organa rješenjem.

#### Član 17.

(Uslovi za izdavanje odobrenja za nabavku oružja pravnom licu i poduzetniku)

(1) Odobrenje za nabavku oružja može se izdati pravnom licu i poduzetniku koji ispunjavaju sljedeće uslove:

- a) da imaju opravdani razlog za nabavku oružja;
- b) da odgovorno lice i lice zaduženo za bezbjednost, odnosno koje će imati odobrenje za nošenje oružja, ispunjava opšte i posebne uslove iz člana 10. ovog Zakona, osim uslova iz stava (3) tačke c) člana 10. ovog Zakona;
- c) da ima prostor za siguran smještaj i čuvanje oružja u skladu sa pravilnikom iz stava (5) ovog člana.

(2) Opravdani razlog za nabavku oružja ima pravno lice i poduzetnik koji je registrovan kod nadležnog suda, za obavljanje djelatnosti lova, uzgoja divljači, sportskog streljaštva, vođenje civilnih strelišta, obavljanje poslova fizičke zaštite, osposobljavanja osoba za pravilnu upotrebu vatrenog oružja, znanstvenog istraživanja za koje je potrebno oružje, kao i pravno lice koje ima uspostavljenu unutrašnju službu za zaštitu ljudi i imovine u skladu sa važećim propisima.

(3) Nadležni organ može izdati odobrenje za nabavku oružja privrednim društvima koja se bave proizvodnjom municije u svrhu vršenja testiranja gotovih proizvoda.

(4) Pravno lice i poduzetnik iz stava (2) ovog člana koji je registrovan za obavljanje djelatnosti lova i uzgoja divljači, za dobivanje odobrenja za nabavku oružja mora ispunjavati i uslove određene propisima o lovstvu.

(5) Način i uslove za siguran smještaj i čuvanje oružja i municije pravilnikom utvrđuje ministar na prijedlog komesara.

#### Član 18.

(Rješavanje o zahtjevu pravnog lica)

(1) Odobrenje za nabavku oružja izdaje se pravnom licu i poduzetniku koji ispunjava uslove iz člana 17. ovog Zakona.

(2) O izdavanju odobrenja iz stava (1) ovog člana odlučuje rukovodilac nadležnog organa rješenjem.

### Član 19.

#### (Ograničenja posjedovanja oružja)

(1) Fizičko lice može imati najviše pet pištolja ili revolvera i sedam komada lovačkog oružja za koje su mu izdate isprave o oružju.

(2) Pravno lice i poduzetnik, izuzev agencije i unutrašnje službe za zaštitu ljudi i imovine, može posjedovati vatreno oružje čiji broj zavisi od potrebe i broja zaposlenih osoba koje imaju potrebu za korištenje oružja.

(3) Agencija i unutrašnja služba za zaštitu ljudi i imovine može posjedovati oružje čiji je broj propisan Zakonom o agencijama i unutrašnjim službama za zaštitu ljudi i imovine.

(4) Pravno lice i poduzetnik, rukovanje i korištenje oružja može povjeriti samo punoljetnoj osobi koja ispunjava uslove propisane članom 10. stavom (2) tačkama c), d) i e), stavom (3) tačkama a) i b) i stavom (4) Zakona.

### Član 20.

#### (Žalba)

(1) Protiv rješenja iz člana 16. i 18. ovog Zakona, podnositelj zahtjeva može izjaviti žalbu ministarstvu – Ured komesara, u roku od 15 dana od dana prijema rješenja.

(2) Protiv rješenja donesenog po žalbi ne može se voditi upravni spor.

### Član 21.

#### (Važenje odobrenja)

(1) Nadležni organ izdaje odobrenje za nabavku oružja fizičkom i pravnom licu s rokom važenja od šest mjeseci od dana izdavanja.

(2) Odobrenje za nabavku oružja koje nije iskorišteno u roku iz stava (1) ovog člana fizičko ili pravno lice dužno je vratiti nadležnom organu u roku od osam dana od dana isteka roka važenja.

(3) Odobrenje za nabavku oružja oduzet će se ako nakon izdavanja odobrenja stranka prestane ispunjavati jedan od uslova za izdavanje odobrenja utvrđenim članom 10. Zakona.

(4) O oduzimanju odobrenja iz stava (3) ovog člana nadležni organ donosi rješenje protiv kojeg se može izjaviti žalba ministarstvu-Ured komesara u roku od 15 dana od dana prijema rješenja.

### Član 22.

#### (Registrovanje oružja i izdavanje oružnog lista i odobrenja za držanje oružja)

(1) Fizičko lice koje je nabavilo oružje na osnovu odobrenja za nabavku oružja dužan je nadležnom organu podnijeti zahtjev za registriranje oružja i izdavanje oružnog lista u roku od osam dana od dana nabavke.

(2) Pravno lice i poduzetnik koji su nabavili oružje na osnovu odobrenja za nabavku oružja dužni su nadležnom organu podnijeti zahtjev za izdavanje odobrenja za držanje oružja u roku osam dana od dana nabavke.

(3) Nadležni organ za registrovano oružje fizičkom licu izdaje oružni list za držanje oružja ili oružni list za držanje i nošenje oružja.

(4) Nadležni organ za registrovano oružje pravnom licu i poduzetniku izdaje odobrenje za držanje oružja.

(5) Obrazac i sadržaj obrasca oružnog lista i dozvole za nošenje oružja utvrđuje se pravilnikom.

(6) Nadležni organ obavijestit će odabranog ljekara porodične medicine za lica kojima je izdat oružni list.

### Član 23.

#### (Odbijanje izdavanja oružnog lista i odobrenja za držanje oružja)

(1) Oružni list i odobrenje za držanje oružja ne može se izdati za:

- oružje za koje se ne može dokazati porijeklo;
- oružje koje prije stavljanja u promet nije označeno pečatom ili obilježeno u skladu sa posebnim Zakonom;
- ako nisu ispunjeni uslovi iz člana 10. stava (2) tački c), d) i e) i stava (3) tačke a).

(2) U slučaju iz stava (1) tački a) i b) ovog člana rukovodilac nadležnog organa donosi rješenje kojim odbija zahtjev iz člana 22. ovog Zakona i oduzima oružje i odobrenje za nabavku oružja, bez prava na naknadu.

(3) Oružje oduzeto u skladu sa stavom (2) ovog člana uništava ministarstvo.

(4) U slučaju iz stava (1) tačke c) ovog člana postupit će se u skladu sa članom 50. ovog Zakona.

(5) Protiv rješenja donesenog po žalbi ne može se voditi upravni spor.

### Član 24.

#### (Rješavanje o zahtjevu za nošenje oružja)

(1) Fizičko lice koje želi nositi oružje za ličnu bezbjednost za koje ima oružni list podnosi

nadležnom organu pismeno obrazloženi zahtjev za nošenje oružja.

(2) O zahtjevu iz stava (1) ovog člana rukovodilac nadležnog organa donosi rješenje.

(3) Fizičko lice kojem je odobreno nošenje oružja dužno je nadležnom organu podnijeti zahtjev za izdavanje dozvole za nošenje oružja za ličnu bezbjednost u roku od osam dana od dana prijema rješenja iz stava (2) ovog člana.

(4) Nadležni organ će rješenjem odbiti zahtjev za izdavanje odobrenja za nošenje oružja fizičkom licu koje je podnijelo zahtjev za nošenje oružja ukoliko se ocijeni da to ugrožava interes bezbjednosti ili ukoliko se poduzimanjem redovnih i dodatnih mjera nadležnog organa može osigurati odgovarajuća zaštita tog lica.

(5) Protiv rješenja iz stava (4) ovog člana može se izjaviti žalba ministarstvu - Ured komesara u roku od 15 dana od dana prijema rješenja.

(6) Protiv rješenja donezenog po žalbi ne može se voditi upravni spor.

### Član 25.

#### (Važenje i produžavanje isprava o oružju)

(1) Oružni list za držanje, oružni list za držanje i nošenje oružja i odobrenje za držanje oružja izdaje nadležni organ s rokom važenja od deset godina, odnosno sa rokom važenja uvjerenja o zdravstvenoj sposobnosti.

(2) Rok važenja dozvole za nošenje oružja traje do isteka roka važenja oružnog lista na osnovu kojeg je dozvola izdata.

(3) Vlasnik oružja kojem je izdat oružni list za držanje, oružni list za držanje i nošenje oružja i odobrenje za držanje oružja, dužan je u roku od 30 dana prije isteka roka iz stava (1) ovog člana, podnijeti zahtjev za produženje važenja isprave o oružju.

(4) Vlasnik oružja uz zahtjev iz stava (3) ovog člana prilaže dokaze o:

- ispravnosti oružja, izdatog od pravnog lica ili poduzetnika registrovanog za popravljanje i prepravljanje oružja;
- ispunjavanju uslova u pogledu zdravstvene sposobnosti za držanje i nošenje oružja.

(5) Vlasnik lovačkog i sportskog oružja uz zahtjev iz stava (3) ovog člana pored dokaza iz stava (4) ovog člana prilaže i uvjerenje da je član lovačke, odnosno streljačke organizacije, koje ne može biti starije od šest mjeseci.

(6) Prilikom produženja isprave o oružju iz stava (3) ovog člana nadležni organ utvrđuje, ispunjavanja li vlasnik oružja uslove propisane članom 10. stavom (2) tačkama c), d) i e) i članom 17. ovog Zakona.

(7) Ukoliko u roku iz stava (3) ovog člana ne podnose zahtjev za produženje važnosti isprava o oružju vlasnik oružja je dužan nakon isteka navedenog roka oružje, municiju i isprave o oružju predati nadležnom organu.

### Član 26.

#### (Nabavljanje municije)

Municija se može nabavljati samo za vrstu oružja za koje lice ima važeću ispravu o oružju.

### Članak 27.

#### (Odobrenje za sakupljanje i držanje starog i odobrenje za držanje trofejnog oružja)

(1) Odobrenje za sakupljanje i držanje starog i odobrenje za držanje trofejnog oružja izdaje nadležni organ na zahtjev fizičkog i pravnog lica na neodređeno vrijeme.

(2) Nadležni organ izdaje odobrenje iz stava (1) ovog člana fizičkom licu koje ispunjava uslove iz člana 10. ovog Zakona.

(3) Nadležni organ izdaje odobrenje iz stava (1) ovog člana pravnom licu i poduzetniku koji ispunjava uslove propisane članom 17. ovog Zakona.

(4) Ispunjavanje uslova iz stava (2) i (3) ovog člana utvrđuje Komisija za utvrđivanje prostornih i tehničkih uslova smještaja oružja i municije, koju imenuje ministar, na prijedlog komesara.

(5) Oružje koje se drži na osnovu odobrenja iz stava (1) ovog člana ne smije se nositi, koristiti niti se za njega smije nabavljati, držati ili dobiti municija.

(6) Oružje iz stava (1) ovog člana smije se prodati ili predati samo fizičkom ili pravnom licu kojem je izdato odobrenje iz stava (1) ovog člana, o čemu je fizičko i pravno lice dužno obavijestiti nadležni organ u roku od osam dana od dana nabavke, odnosno prodaje ili predaje.

(7) Vatreno oružje koje je onesposobljeno za upotrebu ne smije se osposobljavati.

(8) Izuzetno, muzeji uz staro oružje mogu sakupljati i oružje kategorije A koje se više ne izrađuje ili koje ne upotrebljavaju oružane snage ili policijski službenici, pod uslovom da je trajno onesposobljeno.

### Član 28.

#### (Oružje s obavezom prijavljivanja nadležnom organu)

(1) Fizičko lice starije od 18 godina i pravno lice može bez odobrenja nadležnog organa nabavljati i držati oružje kategorije C.

(2) Lice iz stava (1) ovog člana koje nabavi oružje kategorije C, dužno je prijaviti nadležnom organu u roku od osam dana od dana nabavljanja na

propisanom obrascu i uz prijavu dostaviti dokaz o porijeklu oružja.

(3) Za prijavljeno oružje nadležni organ izdaje potvrdu o prijavi.

(4) Fizičko i pravno lice koje posjeduje registrovano lovačko ili sportsko oružje može nabaviti optički nišan za to oružje bez odobrenja nadležnog organa.

(5) Ovlašteni trgovac oružjem dužan je prodaju oružja iz stava (2) ovog člana prijaviti nadležnom organu u roku od osam dana od dana prodaje.

(6) Izgled i sadržaj obrasca za prijavu oružja i potvrde o prijavljenom oružju iz stava (2) i (3) ovog člana utvrđuje pravilnikom ministar na prijedlog komesara.

### POGLAVLJE III. POSTUPANJE S ORUŽJEM I MUNICIJOM

#### Član 29.

(Prodaja i onesposobljavanje oružja i municije)

(1) Oružje i municija se može prodati ili predati samo fizičkom ili pravnom licu koje ima odobrenje za nabavljanje oružja i municije.

(2) Ovlašteni trgovac za promet oružja i municije dužan je o prodaji oružja i municije koje se nabavlja na osnovu odobrenja za nabavljanje oružja i municije obavijestiti nadležni organ u roku od osam dana od dana prodaje.

(3) Fizička i pravna lica iz stava (1) ovog člana dužna je o prodaji oružja obavijestiti nadležni organ i odjaviti oružje u roku od osam dana od dana prodaje.

(4) Zamjena vatretnog oružja između vlasnika može se izvršiti samo ako oružni listovi glase na istu vrstu vatretnog oružja.

(5) Lica koja zamjenjuju oružje dužna su u roku od osam dana od dana sklapanja ugovora o zamjeni obavijestiti nadležni organ i podnijeti zahtjev za registrovanje oružja.

(6) Fizičko lice koja posjeduje oružje za koje je izdat oružni list, može takvo oružje trajno onesposobiti za upotrebu kod poduzetnika ili pravnog lica koja ima odobrenje za obavljanje djelatnosti popravka, prepravka i onesposobljavanja oružja.

(7) Ovlaštena osoba koja je izvršila onesposobljavanje oružja izdaje odgovarajuću potvrdu.

(8) Troškove onesposobljavanja oružja snosi vlasnik oružja.

(9) Vlasnik oružja dužan je prijaviti trajno onesposobljeno oružje nadležnom organu u roku od osam dana od dana onesposobljavanja uz dostavu

potvrde iz stava (7) ovog člana, radi poništenja oružnog lista.

(10) Vatreneo oružje koje je onesposobljeno za upotrebu ne smije se osposobljavati.

#### Član 30.

(Postupanje s oružjem i municijom)

(1) Sa oružjem i municijom mora se postupati s posebnom pažnjom.

(2) Posebna pažnja u postupanju s oružjem i municijom podrazumijeva propisano čuvanje, pravilno, profesionalno i pažljivo rukovanje, nošenje, prenošenje i držanje u ispravnom stanju.

#### Član 31.

(Nošenje oružja)

(1) Oružje za ličnu bezbjednost ne smije se nositi bez dozvole za nošenje oružja.

(2) Vlasnik ili korisnik koji ima pravo nošenja oružja dužan je nositi oružje na način kojim se ne ugrožava ličnu bezbjednost i bezbjednosti drugih lica.

(3) Vlasnik ili korisnik oružja kojem je izdat oružni list ili odobrenje za držanje oružja, može prenositi oružje samo radi popravljanja, prepravljanja, onesposobljavanja ili upotrebe na strelištu, pod uslovom da je oružje demontirano, ukoliko je to tehnički moguće, ili da je municija fizički odvojeno od oružja, u odgovarajućim navlakama ili kovčezima.

(4) Izvan lovišta, odnosno strelišta vatreno i vazdušno oružje mora se držati, odnosno nositi u odgovarajućim futrolama i kovčezima i ne smije biti napunjeno.

(5) Zabranjeno je nošenje vatretnog, vazdušnog i hladnog oružja na javnim, vjerskim i sportskim okupljanjima, u školama, zdravstvenim i javnim ustanovama, ugostiteljskim objektima i prostorima koji se koriste za pružanje ugostiteljskih usluga, kao i na drugim mjestima ili objektima gdje je javno istaknuta zabrana o nošenju oružja.

(6) Fizičko lice ne smije nositi oružje kada je pod uticajem alkohola, opojnih droga ili drugih omamljujućih sredstava, odnosno kada je u takvom stanju da nije u mogućnosti shvatiti značenje svog postupanja, odnosno vladati svojom voljom.

(7) Oružje se ne smije nositi na javnom mjestu na način kojim se može izazvati osjećaj fizičke ugroženosti, uznemirenosti i negodovanje građana.

(8) Odredba stava (5) ovog člana ne odnosi se na sportsko oružje u slučaju kada se ono nosi radi takmičenja u gađanju.

## Član 32.

## (Čuvanje oružja i municije)

(1) Oružje i municija čuvaju se na način da nisu dostupni drugim licima, posebno djeci, zaključani i odvojeni u metalnom ormaru, drvenom ormaru, sefu ili sličnom spremištu, koje se ne može otvoriti alatom uobičajene upotrebe.

(2) Oružje i municija čuvaju se u stambenom ili drugom odgovarajućem prostoru koji se nalazi u mjestu prebivališta, odnosno sjedišta vlasnika oružja i municije.

(3) Vlasnik oružja koji oružje drži na osnovu oružnog lista, odnosno odobrenja za držanje oružja, dužan je na poziv nadležnog organa donijeti oružje na pregled. Način pozivanja propisati će se Pravilnikom o utvrđivanju uslova i rokova za pregled oružja koji će donijeti ministar na prijedlog komesara.

(4) Način i uslove za siguran smještaj i čuvanje oružja i municije utvrđuje pravilnikom ministar na prijedlog komesara.

## Član 33.

## (Dotrajalo oružje)

(1) Vlasnik oružja čije je oružje dotrajalo da njegova upotreba može ugroziti bezbjednost ljudi, a ne postoji mogućnost da se oružje popravi ili prepravi, dužan je takvo oružje predati nadležnom organu i podnijeti zahtjev da se isto oružje briše iz evidencije o registrovanom oružju.

(2) Oružje iz stava (1) ovog člana prima se uz izjavu vlasnika da oružje predaje bez naknade.

(3) Vlasnik oružja iz stava (1) ovog člana može onesposobiti oružje kod pravnog lica ili poduzetnika ovlaštenog za popravljanje i prepravljanje oružja i dužan je podnijeti zahtjev za izdavanje odobrenja za držanje trofejnog oružja.

(4) Oružje iz stava (1) ovog člana kao i bitni dijelovi oružja uništavaju se u skladu sa odredbama ovog Zakona.

## Član 34.

## (Postupci s oružjem i municijom u slučaju napuštanja mjesta prebivališta)

(1) Vlasnik oružja i municije koji napušta mjesto prebivališta ili boravišta na vrijeme dulje od šest mjeseci, dužan je oružje i municiju predati na čuvanje fizičkom licu koji posjeduje odgovarajuću ispravu za tu vrstu oružja ili ovlaštenom trgovcu oružjem.

(2) Vlasnik oružja i municije dužan je o predaji oružja i municije na čuvanje, obavijestiti nadležni organ u roku od osam dana od dana predaje.

## Član 35.

## (Rukovanje i upotreba oružja)

(1) Vlasnik oružja dužan je oružje održavati u ispravnom stanju, pravilno i s posebnom pažnjom rukovati oružjem.

(2) Zabranjena je upotreba oružja na javnom mjestu i drugim mjestima na kojima se upotreboti oružja može ugroziti bezbjednost ljudi i objekata te narušiti javni red i mir.

(3) Lovačko oružje ne smije se upotrebljavati izvan lovišta ili civilnih strelišta.

(4) Sportsko oružje ne smije se upotrebljavati izvan civilnih i sportskih strelišta.

(5) Izuzetno od odredbe stava (4) ovog člana, vazdušno oružje i luk se smiju upotrebljavati i na mjestima koja su po svom položaju ili po poduzetim mjerama osiguranja takva, da se ne može ugroziti bezbjednost građana.

(6) Oružje je zabranjeno davati na upotrebu djeci.

(7) Izuzetno od stava (6) ovog člana, vazdušno oružje ili luk mogu se dati na upotrebu djeci starijoj od 11 godina na sportskim strelištima i na drugim mjestima određenim i uređenim za vježbe gađanja pod nadzorom trenera koji ispunjava uslove iz člana 10. ovog Zakona i uslove propisane posebnim propisom o sportu.

(8) Električni paralizatori i raspršivači, odnosno sprejevi iz kategorije D, upotrebljavaju se samo za samoodbranu i na način da se time ne ugrožava bezbjednost drugih osoba.

## Član 36.

## (Povjeravanje nošenja oružja i municije)

(1) Pravno lice i poduzetnik koji posjeduje oružje i municiju u skladu sa člancima 17. i 18. ovog Zakona, može povjeriti nošenje oružja i municije fizičkom licu koji obavlja poslove zaštite i koji ispunjava uslove propisane članom 10. stavom (2) tačkama a), c) i d) i stavom (3) tačkama a) i b) istog člana.

(2) Fizičko lice iz stava (1) ovog člana, oružje i municiju koje joj je povjereno, može nositi samo za vrijeme obavljanja poslova zaštite i oružje ne smije nositi izvan objekta ili područja koje se osigurava ili čuva.

(3) Izuzeto od odredbe stava (2) ovog člana, čuvari usjeva i šuma, čuvari lovišta i ribolovišta koji ne stanuju na području koje čuvaju, mogu nositi oružje i izvan tog područja do svog mjeseta stanovanja, a lica koje osiguravaju imovinu koja se prevozi ili prenosi, mogu nositi oružje prilikom osiguranja te imovine.

(4) Pravno lice iz stava (1) ovog člana izdaje potvrdu fizičkom licu kojoj povjerava oružje i o tome

je dužno obavijestiti nadležni organ u roku od osam dana.

(5) Obrazac i sadržaj obrasca potvrde iz stava (4) ovog člana utvrđuje sa pravilnikom koji donosi ministar na prijedlog komesara.

### Član 37.

(Davanje na posudbu oružja)

(1) Pištolj i revolver se ne mogu davati na posudbu drugoj osobi.

(2) Lovačko i sportsko oružje mogu se dati na posudbu drugom fizičkom licu koji ima oružni list za tu vrstu oružja i u slučajevima propisanim u člancima 38. i 39. ovog Zakona.

(3) Oružje iz stava (2) ovog člana ne smije se davati na posudbu maloljetnoj osobi.

### Član 38.

(Davanje na posudbu sportskog oružja)

(1) Streljačka organizacija i lovačko udruženje može davati na posudbu oružje i municiju samo svojim članovima i to za vrijeme dok vrše vježbe gađanja ili se takmiče u gađanju na strelištu i na drugim terenima određenim za vršenje vježbe gađanja, odnosno takmičenja u gađanju.

(2) Streljačka organizacija i lovačko udruženje, ukoliko se njihov spremnik ne nalazi na strelištu, dužni su svojim članovima izdati potvrdu za nošenje oružja do strelišta ili terena iz stava (1) ovog člana koja važi samo za dane kada se vrši vježba gađanja, odnosno takmičenje u gađanju.

### Član 39.

(Davanje na posudbu lovačkog oružja)

(1) Pravno lice i poduzetnik iz člana 17. ovog Zakona može članovima domaćih i inostranih lovačkih organizacija давати на posudbu lovačko oružje i municiju ukoliko ispunjava sve uslove određene propisima o lovstvu.

(2) Pravno lice i poduzetnik iz stava (1) ovog člana može članovima domaćih i inostranih lovačkih organizacija давати na posudbu lovačko oružje i municiju najdulje osam dana, i to samo za lov u lovištu na koje je stekao pravo u skladu sa propisima iz oblasti lovstva.

(3) Pravno lice i poduzetnik dužan je odmah, a najkasnije u roku od 48 sati obavijestiti nadležni organ o davanju lovačkog oružja i municije na poslužu članovima domaćih i inostranih lovačkih organizacija.

(4) Pravno lice i poduzetnik iz stava (1) ovog člana, za oružje i municiju izdaje potvrdu za

nošenje oružja i municije, o čemu vodi evidenciju.

(5) Lice kojem je dato oružje i municija ne smije iznositi oružje i municiju izvan lovišta iz stava (2) ovog člana.

(6) Ministar na prijedlog komesara utvrđuje pravilnikom obrazac i sadržaj obrasca potvrde i evidencije iz stava (4) ovog člana.

### Član 40.

(Postupanje u slučaju prestanka potrebe za držanjem oružja i municije)

(1) Pravno lice i poduzetnik koji posjeduje oružje i municiju u skladu sa ovim Zakonom, a kod kojega je iz bilo kojih razloga prestala potreba za dalnjim držanjem oružja i municije obavještava o tome nadležni organ u roku od osam dana od dana prestanka potrebe držanja oružja i municije.

(2) Nadležni organ preuzima oružje i preostalu municiju i odobrenje za držanje oružja i postupa u skladu sa članom 50. ovog Zakona.

(3) Nadležni organ može odobriti pravnom licu čuvanje oružja i municije do prodaje ako ispunjava uslove utvrđene Pravilnikom o uslovima smještaja i čuvanja oružja i municije.

### Član 41.

(Postupanje u slučaju nestanka ili krađe oružja i municije ili isprave o oružju)

(1) Pravno i fizičko lice, koje posjeduje oružje i municiju u skladu sa ovim Zakonom, u slučaju nestanka ili krađe oružja i municije ili isprave o oružju dužno je prijaviti nestanak ili krađu nadležnom organu odmah, a najkasnije u roku od dva sata od saznanja da su oružje i municija nestali ili ukradeni.

(2) Pravno i fizičko lice dužno je o vlastitom trošku u Službenim novinama F BiH ili Službenom glasniku BiH oglasiti nestanak isprava o oružju, izuzev nestanka odobrenja za nabavljanje oružja i municije.

(3) Prijave iz stava (1) i (2) ovog člana podnose se nadležnom organu prema mjestu događanja ili saznanja o nestanku ili krađi oružja i municije.

(4) U prijavi se navode okolnosti pod kojima su oružje i municija izgubljeni ili ukradeni, a koje su podnosiocu prijave poznati.

### Član 42.

(Pronalazak oružja i municije)

(1) Lice koje nađe oružje ili municiju ili sazna za skriveno oružje ili municiju dužno je o tome odmah obavijestiti nadležni organ.

(2) Ukoliko vlasnik pronađenog oružja ne preuzme oružje u roku od 30 dana od dana obavijesti

o pronalasku oružja, s oružjem će se postupiti u skladu sa odredbama člana 46. i člana 50. ovog Zakona.

### Član 43.

(Promjena prebivališta, ličnog imena, naziva ili sjedišta)

(1) Ako vlasnik oružja kome je izdata isprava o oružju, promijeni prebivalište, odnosno sjedište, obvezan je u roku od 30 dana od dana promjene prebivališta, odnosno sjedišta, prijaviti promjenu prebivališta, odnosno sjedišta nadležnom organu na čijem području se nalazi novo prebivalište, odnosno sjedište radi upisa podataka u odgovarajuću evidenciju isprava o oružju.

(2) Kada fizičko ili pravno lice koje prema ovom Zakonu posjeduje oružje promjeni lično ime ili naziv, obvezna je o tome obavijestiti nadležni organ u roku od 30 dana od dana promjene radi upisa odgovarajućih podataka u službene evidencije u isprave o oružju.

### Član 44.

(Postupak s oružjem i municijom u slučaju smrti vlasnika oružja)

(1) U slučaju smrti vlasnika oružja i municija punoljetni član njegove porodice, zakonski zastupnik, staratelj, fizičko lice koje je s njim živjelo u zajedničkom domaćinstvu ili fizičko lice kod kojeg se oružje i municija u trenutku smrti nalazi, dužno je odmah po saznanju o postojanju oružja i municije, predati nadležnom organu na čuvanje oružje, municiju i odgovarajuću ispravu izdatu za to oružje.

(2) Nadležni organ o predanom oružju i municiji iz stava (1) ovog člana izdaje potvrdu.

(3) Nasljednik oružja dužan je u roku od 60 dana od dana pravosnažnosti rješenja o nasljeđivanju:

- a) oružje prodati ili pokloniti licu koje ima odobrenje za nabavku te vrste oružja;
- b) podnijeti zahtjev za registrovanje oružja;
- c) onesposobiti oružje, te ga zadržati u skladu sa ovim Zakonom;
- d) predati oružje na uništenje;
- e) predati oružje u korist ministarstva bez naknade.

(4) Izuzetno od stava (3) ovog člana, oružje maloljetnog nasljednika dok ne napuni 21 godinu života čuvat će se kod nadležnog organa dok ne navrši 21 godinu života.

(5) Nasljednik iz stava (4) ovog člana s napunjenoj 21. godinom života dužan je s oružjem postupiti na način propisan stavom (3) ovog člana.

(6) Nasljednik oružja koji oružje proda dužan je oružje odjaviti u nadležnom organu u roku od osam dana od dana prodaje.

### Član 45.

(Postupci s nasljeđenim oružjem i municijom)

(1) Nasljedniku oružja koji podnese zahtjev za registrovanje nasljeđenog oružja i municije nadležni organ izdaje odgovarajuću ispravu o oružju, ukoliko ispunjava uslove iz člana 10. ovog Zakona. Oružje koje je nasljednik predao na uništenje, odjavljuje se po službenoj dužnosti.

(2) Ukoliko nasljednik oružja i municije u roku od 60 dana od dana pravosnažnosti rješenja o nasljeđivanju ne postupi u skladu sa članom 44. stav (3) ovog Zakona, nadležni organ mu oduzima oružje i municiju i postupa na način propisan članom 50. ovog Zakona.

## POGLAVLJE IV. ODUZIMANJE ORUŽJA, MUNICIJE I ISPRAVA O ORUŽJU

### Član 46.

(Oduzimanje oružja, municije i isprava o oružju fizičkom i pravnom licu)

(1) Oružje, municija i isprave o oružju oduzimaju se od fizičkog lica ako prestane ispunjavati uslove iz člana 10. stava (2) tački b), c) i e), člana 10. stava (3) tački a) i c) ovog Zakona.

(2) Oružje, municija i isprave o oružju oduzimaju se od vlasnika oružja koji u roku iz člana 25. stava (3) i (7) ovog Zakona ne podnese zahtjev za produženje važenja isprave o oružju i ne preda oružje, municiju i ispravu o oružju nadležnom organu, a nakon pisanog obaveštenja nadležnog organa 60 dana prije isteka roka važenja isprave.

(3) U slučajevima iz stava (1) ovog člana oduzima se trofejno oružje kao i staro oružje.

(4) Oružje, municija i isprave o oružju oduzimaju se pravnom licu i poduzetniku ako pravno lice i poduzetnik prestanu ispunjavati neke od uslova iz člana 17. stava (1) ovog Zakona.

(5) O slučajevima iz stava (1), (2), (3) i (4) ovog člana odlučuje rukovodilac nadležnog organa rješenjem.

(6) S oduzetim oružjem i municijom postupa se u skladu sa članom 50. ovog Zakona.

(7) Protiv rješenja iz stava (5) može se izjaviti žalba ministarstvu – Ured komesara u roku od 15 dana od dana prijema rješenja.

(8) Žalba ne odgađa izvršenje rješenja.

(9) Protiv rješenja donesenog po žalbi ne može se voditi upravni spor.

## Član 47.

(Vanredni zdravstveni pregled)

(1) Nadležni organ upućuje vlasnika oružja za kojeg se opravdano sumnja da više nije zdravstveno sposoban za držanje i nošenje oružja na vanredni zdravstveni pregled kod nadležne zdravstvene ustanove iz člana 13. stava (3) ovog Zakona.

(2) Vlasnik oružja iz stava (1) ovog člana dužan je u roku od 30 dana od dana prijema rješenja o upućivanju na vanredni zdravstveni pregled dostaviti nadležnom organu uvjerenje o zdravstvenoj sposobnosti za držanje i nošenje oružja.

(3) Troškove zdravstvenog pregleda vlasnika oružja iz stava (1) ovog člana koji je proglašen zdravstveno sposobnim za držanje i nošenje oružja snosi nadležni organ koji ga je uputio na zdravstveni pregled.

(4) Vlasnik oružja iz stava (1) ovog člana za kojeg se na vanrednom zdravstvenom pregledu utvrdi da nije zdravstveno sposoban za držanje i nošenje oružja, sam snosi troškove vanrednog liječničkog pregleda.

(5) Nadležni organ oduzima oružje, municiju, oružni list i odobrenje za sakupljanje i držanje starog oružja vlasniku oružja koji je na vanrednom ljekarskom pregledu ocijenjen nesposobnim za držanje, nošenje i sakupljanje oružja ili koji u roku iz stava (2) ovog člana ne dostavi uvjerenje o zdravstvenoj sposobnosti za držanje, nošenje i sakupljanje oružja.

(6) O slučajevima iz stava (1) i (2) ovog člana odlučuje rukovodilac nadležnog organa rješenjem.

## Član 48.

(Privremeno oduzimanje oružja, municije i isprava o oružju)

(1) Policijski službenik od vlasnika oružja privremeno oduzima oružje, municiju, dijelove oružja i isprave o oružju ako postoji osnova sumnje da:

- a) je vlasnik oružja izvršio krivično djelo, izuzev krivičnog djela protiv bezbjednosti javnog saobraćaja ili prekršaja protiv javnog reda i mira, prekršaj propisan Zakonom o oružju i municiji ili nasilje predviđeno drugim zakonom,
- b) je s njim izvršeno krivično djelo ili prekršaj;
- c) su pribavljeni krivičnim djelom ili prekršajem;
- d) su nastali izvršenjem krivičnog djela ili prekršaja;
- e) prestankom uslova propisanih članom 11. stav (2) Zakona.

(2) Oružje, municija i isprave o oružju privremeno se oduzimaju odmah i prije dovršetka upravnog, prekršajnog i krivičnog postupka; ako postoje

okolnosti koje ukazuju da bi oružje moglo biti zloupotrebljeno.

(3) U slučajevima iz stava (1) i (2) ovog člana policijski službenik dužan je izdati potvrdu o privremeno oduzetim predmetima.

## Član 49.

( Čuvanje oduzetog oružja i municije)

Oduzeto oružje i municiju iz člana 46. ovog Zakona čuva se u depozitu nadležnog organa, do završetka postupka.

## Član 50.

(Postupak s oružjem i municijom oduzetim u upravnom postupku)

(1) Oružje i municija koja je oduzeta u pravosnažno dovršenom upravnom postupku vlasnik može prodati ili darovati fizičkom ili pravnom licu koje posjeduje odobrenje za nabavku te vrste oružja u roku od tri mjeseca od pravosnažnosti rješenja o oduzimanju oružja i municije.

(2) Oružje i municija koja ne bude prodata ili darovana u roku iz stava (1) ovog člana uništava se.

(3) Bliže odredbe o uništenju oružja i municije iz stava (2) ovog člana utvrđuje ministar pravilnikom.

## Član 51.

(Postupak s oružjem i municijom oduzetom u prekršajnom ili krivičnom postupku)

S oružjem i municijom oduzetom u pravosnažnom okončanom prekršajnom ili krivičnom postupku postupa se u skladu sa odlukom nadležnog suda.

## POGLAVLJE V. PROMET ORUŽJA I MUNICIJE

## Član 52.

(Uslovi za promet oružja i municije)

(1) Prometom oružja i municije kategorije B, C i D može se baviti ovlašteni trgovac oružjem koji:

- a) ima registrovanu djelatnost prometa oružja i municije u sudskom registru;
- b) ima odobrenje za obavljanje prometa oružja i municije.

(2) Zahtjev za izdavanje odobrenja iz stava (1) tačke b) ovog člana ovlašteni trgovac oružjem podnosi ministarstvu.

(3) Odobrenje iz stava (1) tačka b) ovog člana ministarstvo izdaje ovlaštenom trgovcu oružjem koji ispunjava sljedeće uslove:

- a) da je registrovan za obavljanje djelatnosti prometa oružja i municije;

## Hercegovačko-neretvanskog kantona

- b) da vlasnik i odgovorna osoba u pravnom licu ispunjava uslove iz člana 10. stava (2) tački c), d) i e) i stava (3) tački a) i b) ovog Zakona;
  - c) da osoba koja neposredno obavlja poslove prometa oružja i municije ima navršenih 18 godina života i da ispunjava uslove iz člana 10. stava (2) tački c) i d) i stava (3) tački a) i b) ovog Zakona;
  - d) da ima pravo vlasništva ili pravo korištenja poslovnog prostora u kojem će se obavljati promet oružja i municije;
  - f) da prostor u kojem će se obavljati promet oružja i municije bude uređen u skladu sa prostornim i tehničkim uslovima za siguran smještaj i promet oružja i municije.
- (4) Način i uslove za siguran smještaj i čuvanje oružja i municije utvrđuje pravilnikom ministar na prijedlog komesara.

## Član 53.

(Nabava oružja i municije u svrhu prometa)

(1) Ovlašteni trgovac oružjem, oružje i municiju može nabaviti na osnovu posebnog odobrenja za nabavljanje radi daljnje prodaje.

(2) Odobrenje iz stava (1) ovog člana izdaje nadležni organ za svaku ugovorenu količinu oružja i municije i vrijedi šest mjeseci od dana izdavanja.

(3) Zahtjev za izdavanje odobrenja iz stava (1) ovog člana podnosi se nadležnom organu i sadrži:

- a) naziv i adresu prodavača i kupca;
- b) vrstu i količinu oružja, dijelova za oružje i municiju;
- c) naziv i adresu dobavljača.

(4) Odobrenje za nabavljanje oružja i municije iz stava (1) ovog člana neće se izdati ukoliko postoje okolnosti koje ukazuju na ugrožavanje sigurnosti Kantona.

(5) Vatreno oružje koje nije ispitano i obilježeno ne može se stavljati u promet.

## Član 54.

(Prodaja oružja i municije)

(1) Ovlašteni trgovac oružjem može prodavati oružje, dijelove za oružje i municiju fizičkom i pravnom licu koje ima odobrenje za nabavljanje tog oružja i municije.

(2) Ovlašteni trgovac oružjem dužan je:

- a) prilikom prodaje oružja i municije zadržati jedan originalan primjerak odobrenja za nabavljanje oružja i municije, a na drugi primjerak staviti zabilješku o izvršenoj prodaji i ovjeriti vlastitim pečatom i potpisom odgovornog lica;
- b) u roku od pet dana od dana prodaje pismeno obavijestiti organ koji je izdao odobrenje za nabavljanje oružja i municije.

(3) Ovlašteni trgovac oružjem može prodavati municiju na osnovu odgovarajuće isprave izdate za to oružje fizičkom licu, koje ima lovačko oružje s neolučenim cijevima i oružje kategorije C.

POGLAVLJE VI. POPRAVLJANJE I  
PREPRAVLJANJE ORUŽJA

## Član 55.

(Pravno lice i poduzetnik ovlašteni za popravljanje i prepravljanje oružja)

(1) Popravljanjem i prepravljanjem oružja može se baviti pravno lice i poduzetnik koji ima:

- a) registrovanu djelatnost popravljanja i prepravljanja oružja;
- b) odobrenje ministarstva.

(2) Odredbe člana 52. stava (3) ovog Zakona analogno se primjenjuju na pravno lice i poduzetnika iz stava (1) ovog člana.

(3) Bliže odredbe o popravljenom i prepravljenom oružju utvrđuju se pravilnikom koji donosi Ministar na prijedlog komesara.

## Član 56.

(Oružje koje može biti predmet popravljanja i prepravljanja)

Pravno lice i poduzetnik iz člana 55. ovog Zakona može primiti radi popravljanja i prepravljanja samo oružje za koje je izdata odgovarajuća isprava o oružju.

## POGLAVLJE VII. CIVILNA STRELIŠTA

## Član 57.

(Uslovi za osnivanje civilnih strelišta)

(1) Civilno strelište za obavljanje sportske djelatnosti (u dalnjem tekstu: civilno strelište) može osnovati pravno lice i poduzetnik koji:

- a) ima registrovanu djelatnost,
- b) ima odobrenje ministarstva.

(2) Odredbe člana 52. stava (1) i (3) ovog Zakona analogno se primjenjuju na odgovarajući način i na pravno lice i poduzetnika iz stava (1) ovog člana.

(3) Odredbe ovog Zakona ne primjenjuju se na lovačka strelišta koje pravna lica registrirana za obavljanje djelatnosti lova u okviru lovišta upotrebljavaju za gađanje i isprobavanje lovačkog oružja svojih članova prema propisima o lovstvu.

Bliže odredbe o prostornim i tehničkim uslovima civilnih strelišta utvrđuju se pravilnikom koji donosi ministar na prijedlog komesara.

## Član 58.

(Upotreba oružja na strelištu)

(1) Vatreno oružje na civilnom strelištu može koristiti fizičko lice kojem je izdata odgovarajuća isprava o oružju.

(2) Fizičko lice koje ne ispunjava uslove iz stava (1) ovog člana, gađanje može izvoditi samo pod nadzorom ovlaštenog lica civilnog strelišta i isključivo s oružjem i municijom koje je vlasništvo civilnog strelišta.

(3) Ovlašteno lice civilnog strelišta zabranjuje izvođenje gađanja i pristup osobama iz stava (1) i (2) ovog člana, ako su pod uticajem alkohola i narkotika ili ako njihovo psihofizičko stanje ukazuje na nesposobnost rukovanja oružjem.

## Član 59.

(Nabavka oružja i municije za potrebe strelišta)

Pravno lice i poduzetnik iz člana 57. stava (1) ovog Zakona može nabavljati oružje i municiju radi gađanja na civilnom strelištu, u skladu sa članovima 17. i 18. ovog Zakona.

## POGLAVLJE VIII. MEHANIČKI TRAG ORUŽJA

## Član 60.

(Uzimanje mehaničkog traga registrovanog oružja)

(1) Fizičko i pravno lice koje ima registrovano oružje na teritoriji Kantona i pravno i fizičko lice kojem je oružje povjereno na čuvanje, dužno je na poziv nadležnog organa donijeti oružje radi uzimanja mehaničkog traga i unosa u propisanu evidenciju.

(2) Za uzimanje mehaničkog traga oružja iz stava (1) ovog člana ne naplaćuje se naknada.

(3) Oružje fizičkog i pravnog lica koje, zbog tehničke neispravnosti, nije bilo moguće uzeti mehanički trag, vlasnik može o svom trošku trajno onesposobiti ili predati na uništenje u skladu sa Zakonom.

(4) Ministar, na prijedlog komesara imenuje komisiju za obavljanje poslova iz stava (1) ovog člana.

## POGLAVLJE IX. NADZOR

## Član 61.

(Nadzor)

Nadzor nad primjenom ovog Zakona provodi ministarstvo.

## Član 62.

(Ovlaštenja lica koja vrši neposredni nadzor)

(1) U vršenju nadzora iz člana 61. ovog Zakona ministarstvo je ovlašteno da:

- a) pregleda i kontroliše skladište oružja i municije, civilno strelište i druge prostorije gdje se obavlja promet, popravlja, prepravlja i čuva oružje i municija, da vrši pregled propisanih evidencija i ostale dokumentacije u vezi s prometom, popravljanjem i prepravljanjem oružja i vođenje civilnog strelišta;
- b) privremeno zabrani obavljanje djelatnosti prometa i popravljanja ili prepravljanja oružja, upotrebu civilnog strelišta i naredi da se utvrđene nepravilnosti otklone u određenom roku;
- c) zabrani daljnje obavljanje prometa, popravljanja ili prepravljanja oružja, odnosno upotrebu civilnog strelišta ako utvrdi da je u obavljanju tih djelatnosti učinjen teži propust u poduzimanju zaštitnih ili drugih sigurnosnih mjera ili druge teže kažnjive radnje, ukoliko je prestao jedan od uslova pod kojim je odobrenje izdano ili ako se ne postupi po nalogu nadležnog organa;
- d) naredi poduzimanje i drugih propisanih mjera.

(2) Pravno i fizičko lice dužno je omogućiti obavljanje nadzora i dati na uvid traženu dokumentaciju kao i pružiti potrebne podatke i obavijesti.

(3) Ministar na prijedlog komesara imenuje Komisiju za obavljanje nadzora iz stava (1) ovog člana.

(4) Način rada Komisije iz stava (5) ovog člana utvrđuje se pravilnikom koji donosi ministar na prijedlog komesara.

## POGLAVLJE X. EVIDENCIJE

## Član 63.

(Evidencije)

- (1) Nadležni organ vodi evidencije o:
  - a) odobrenju za nabavku oružja;
  - b) oružnom listu za držanje oružja;
  - c) oružni list za držanje i nošenje oružja;
  - d) odobrenje za držanje oružja;
  - e) odobrenju za sakupljanje i držanje starog oružja i odobrenju za držanje trofejnog oružja;
  - f) potvrdi za prijavljeno oružje kategorije C;
  - g) oduzetom, nađenom i predanom oružju i municiji;
  - h) nestalom oružju;
  - i) mehaničkom tragu oružja.

(2) Lični podaci sadržani u evidencijama iz stava (1) ovog člana prikupljaju se, čuvaju i obrađuju u skladu sa odredbama propisa kojima se uređuje zaštita ličnih podataka.

(3) Sadržaj i način vođenja evidencije iz stava (1) ovog člana utvrđuju se pravilnikom, koji donosi ministar na prijedlog komesara.

#### Član 64.

(Evidencije pravnih i fizičkih lica)

(1) Sportska streljačka organizacija i pravno lice registrovano za obavljanje djelatnosti lova, i drugo pravno lice koje je oružje i municiju nabavilo i registrovalo radi obavljanja svoje djelatnosti, dužno je voditi evidenciju o:

- a) nabavljenom oružju i municiji;
- b) izdatim potvrdama za nošenje oružja i municije.

(2) Ovlašteni trgovac oružjem dužan je voditi evidencije o:

- a) nabavljenom oružju i municiji;
- b) prodatom oružju;
- c) prodatom municiji;
- d) oružju i municiji primljenom na čuvanje.

(3) Pravno lice i poduzetnik ovlašten za popravak i prepravak oružja dužan je voditi evidenciju o popravljenom i prepravljenom oružju.

(4) Pravno lice i poduzetnik ovlašten za vođenje civilnog strelišta dužan je voditi evidencije o:

- a) nabavljenom oružju i municiji;
- b) oružju i municiji ustupljenom na korištenje i utrošenoj municiji.

(5) Pravno i fizičko lice kojoj je izdato odobrenje za sakupljanje i držanje starog oružja i držanje trofejnog oružja dužno je voditi evidenciju o sakupljenom i trofejnem oružju.

(6) Evidencije iz stava (1), (2), (3), (4) i (5) ovog člana čuvaju se trajno, a u slučaju smrti fizičkog lica, odnosno prestanka postojanja pravnog lica ili poduzetnika, evidencije se predaju nadležnom organu.

(7) Sadržaj i način vođenja evidencije iz stava (6) ovog člana utvrđuje se pravilnikom koji donosi ministar na prijedlog komesara.

### POGLAVLJE XI. KRIVIČNE ODREDBE ODJELJAK A. KRIVIČNO DJELO

#### Član 65.

(Neovlašteno nabavljanje, držanje ili prodaja oružja ili bitnih dijelova za oružje)

(1) Novčanom kaznom u iznosu od 500,00 do 5000,00 KM ili kaznom zatvora do jedne godine, kaznit će se fizička osoba ako:

- a) bez važeće isprave o oružju nabavlja, drži, nosi ili proda oružje ili bitne dijelove za oružje kategorije B,

- b) nosi oružje za ličnu sigurnost bez dozvole za nošenje oružja (član 31. stav (1));
- c) nosi oružje na javnim, vjerskim i sportskim okupljanjima, u školama, zdravstvenim i javnim ustanovama, ugostiteljskim objektima i prostorima koji se koriste za pružanje ugostiteljskih usluga (član 31. stav (5));
- d) nosi oružje pod uticajem alkohola, opojnih droga i drugih omamljujućih sredstava (član 31. stav (6)).

(2) Ako je predmet djela iz stava (1) ovog člana veća količina oružja ili bitnih dijelova za oružje kategorije B, počinitelj će se kazniti kaznom zatvora od šest mjeseci do pet godina.

(3) Za krivično djelo iz stava (1) ovog člana obvezno se izriče i zaštitna mjera oduzimanja oružja.

### ODJELJAK B. PREKRŠAJI

#### Član 66.

(Novčana kazna od 1.200,00 do 2.500,00 KM i zaštitna mjera za prekršaje fizičkih lica)

(1) Novčanom kaznom od 1.200,00 KM do 2.500,00 KM kaznit će se fizičko lice za prekršaj ako:

- a) nabavlja, drži i nosi oružje kategorije C, vazdušno oružje i električne paralizatore iz kategorije D bez odgovarajuće isprave (član 7. stav (4));
- b) lice mlađe od 18 godina nabavi, drži i nosi oružje kategorije D (član 7. stav (5));
- c) nosi i upotrebljava staro ili trofejno oružje i nabavlja, drži ili pravi municiju za to oružje (član 27. stav (5));
- d) osposobi za upotrebu vatreno oružje koje je bilo onesposobljeno (član 27. stav (7));
- e) proda oružje kategorije C, vazdušno oružje i električne paralizatore iz kategorije D, fizičkom licu mlađem od 18 godina (član 28. stav (1));
- f) nosi oružje na javnom mjestu na način kojim može izazvati osjećanje fizičke ugroženosti, uzinemirenosti i negodovanja građana (član 31. stav (7));
- g) ne čuva oružje i municiju na način da nije dostupno drugoj osobi, posebno djeci, zaključano i odvojeno u metalnom ormaru, sefu ili sličnom spremištu koje se ne može otvoriti alatom uobičajene upotrebe (član 32. stav (1));
- h) ne čuva oružje i municiju u stambenom ili drugom odgovarajućem prostoru koji se nalazi u mjestu prebivališta, odnosno sjedišta vlasnika oružja i municije (član 32. stav (2));

- i) upotrebljava oružje na javnim mjestima i drugim mjestima čime može ugroziti bezbjednost ljudi (član 35. stav (2));
- j) upotrebljava lovačko oružje izvan lovišta ili civilnih streljšta (član 35. stav (3));
- k) električni paralizator i raspršivač, odnosno sprej iz kategorije D, upotrebljava na način da se time ugrožava sigurnost drugih lica (član 35. stav (8));
- l) nosi oružje i municiju kada ne obavlja poslove zaštite, izvan objekta ili područja koje osigurava ili čuva (član 36. stav (2));
- m) pištolj i revolver daje na poslužu drugom licu (član 37. stav (1));
- n) da na poslužu lovačko i sportsko oružje fizičkom licu koji nema oružni list za tu vrstu oružja (član 37. stav (2));
- o) ne obavijesti nadležni organ o pronalasku oružja i municije (član 42. stav (1));
- p) vlasnik koji nakon upućivanja na vanredni ljekarski pregled ne dostavi nadležnom organu ljekarsko uvjerenje u propisanom roku (član 47. stav (2));
- r) ne omogući obavljanje nadzora i uvida u traženu dokumentaciju, kao i ne pruži potrebne podatke i obavijesti (član 62. stav (2));
- s) ne osigura uslove smještaja i čuvanja oružja i municije (član 79.).
- (2) Za prekršaj iz stava (1) ovog člana obavezno se izriče i zaštitna mjera oduzimanja oružja, bitnih dijelova oružja i municije.
- (3) U izvršenju zaštitne mјere iz stava (2) ovog člana oduzima se i isprava o oružju.
- Član 67.**
- (Novčana kazna od 800,00 KM do 2.200,00 KM i zaštitna mјera za prekršaje fizičkih lica)**
- (1) Novčanom kaznom od 800,00 KM do 2.200,00 KM kaznit će se fizičko lice za prekršaj, ako:**
- a) ne dopusti policijskom službeniku da utvrdi postojanje uslova za siguran smještaj i čuvanje oružja (član 12. stav (2));
  - b) u propisanom roku ne podnose zahtjev za registraciju oružja i izdavanje oružnog lista, odnosno odobrenja za držanje oružja (član 22. stav (1));
  - c) u propisanom roku ne podnose zahtjev za produženje isprave o oružju (član 25. stav (3));
  - d) ne predaje oružje nadležnom organu po isteku roka za produženje važnosti isprave o oružju (član 25. stav 7));
  - e) prodaje ili predaje staro i trofejno oružje fizičkom ili pravnom licu koji nema odgovarajuće isprave i ako ne obavijesti u propisanom roku nadležni organ o izvršenom nabavljanju, odnosno prodaji ili predaji (član 27. stav (6));
  - f) ne prijavi nadležnom organu nabavljanje oružja kategorije C, vazdušnog oružja i električnog paralizatora u propisanom roku (član 28. stav (2));
  - g) ne prijavi prodaju optičkog nišana u propisanom roku (član 28. stav (5));
  - h) vatreno oružje koje je onesposobljeno sposobi za upotrebu (član 29. stav (10));
  - i) s oružjem i municijom ne postupi sa posebnom pažnjom (član 30.);
  - j) nosi oružje na način kojim se ugrožava lična bezbjednost ili bezbjednost drugih lica (član 31. stav (2));
  - k) prenosi oružje radi popravljanja, prepravljanja, onesposobljavanja ili upotrebe na streljuštu suprotno ovom Zakonu (član 31. stav (3));
  - l) izvan lovišta, odnosno streljšta drži, odnosno nosi oružje bez futrole ili kovčega i koje je napunjeno (član 31. stav (4));
  - m) na poziv nadležnog organa ne doneose oružje na pregled (član 32. stav (3));
  - n) ne prijavi predaju oružja i municije na čuvanje (član 34. stav (2));
  - o) ne održava oružje u ispravnom stanju i ne rukuje njime pravilno (član 35. stav (1));
  - p) upotrebljava sportsko oružje izvan civilnih i sportskih streljšta (član 35. stav (4));
  - r) vazdušno oružje i luk upotrebljava na mjestima koja mogu ugroziti bezbjednost građana (član 35. stav (5));
  - s) vazdušno oružje i luk da na upotrebu djeci mlađoj od 11 godina na sportskim streljštima i drugim mjestima određenim i uređenim za vježbe gađanja bez nadzora trenera (član 35. stav (7));
  - t) ne pristupi vanrednom ljekarskom pregledu (član 47. stav (1));
  - u) na poziv nadležnog organa ne doneše oružje radi uzimanja mehaničkog traga i unosa u evidencije (član 60. stav (1));
  - v) ne zamjeni ispravu o oružju u propisanom roku (član 75.);
- (2) Za prekršaj iz stava (1) tački d), f), g), h), j), k), m), n), p), r), s), t), u) i v) ovog člana obavezno se izriče i zaštitna mјera oduzimanja oružja, bitnih dijelova oružja i municije i isprava o oružju.

## Član 68.

- (Novčana kazna od 500,00 do 1.200,00 KM i zaštitna mjera za prekršaje fizičkih lica)
- (1) Novčanom kaznom od 500,00 KM do 1.200,00 KM kaznit će se fizičko lice za prekršaj, ako:
- ne obavijesti nadležni organ o promjeni zdravstvenog stanja vlasnika oružja, a koje može da utiče na sposobnost za držanje i nošenje oružja (član 14.);
  - u propisanom roku ne vrati odobrenje za nabavljanje oružja (član 21. stav 2));
  - u određenom roku ne obavijesti nadležni organ o prodaji oružja (član 29. stav (3));
  - u određenom roku ne obavijesti nadležni organ o izvršenoj zamjeni oružja i ne podnese zahtjev za registrovanje (član 29. stav (5));
  - ne prijavi trajno onesposobljeno oružje nadležnom organu (član 29. stav (9));
  - ne predala nadležnom organu oružje za koje ne postoji mogućnost popravke i prepravke (član 33. stav (1));
  - napušta mjesto prebivališta duže od šest mjeseci, a ne predala na čuvanje oružje i municiju fizičkom licu koji posjeduje oružni list ili ovlaštenom trgovcu oružja (član 34. stav (1));
  - član streljačke organizacije koji nosi oružje bez potvrde za nošenje oružja do strelišta ili terena gdje se vrši vježba gađanja, odnosno takmičenja u gađanju (član 38. stav (2));
  - iznosi oružje i municiju izvan lovišta (član 39. stav (5));
  - u roku ne prijavi nestanak ili krađu oružja ili municije (član 41. stav (1));
  - u propisanom roku ne prijavi promjenu prebivališta i ličnog imena (član 43.);
  - u slučaju smrti vlasnika oružja i municije, ne predala oružje, municiju i odgovarajuću ispravu nadležnom organu (član 44. stav (1));
  - nasljednik oružja i municije u propisanom roku ne proda ili daruje oružje i municiju, ne podnese zahtjev za registraciju, onesposobi oružje ili ne predala na uništenje nadležnom organu (član 44. stav (3));
  - lice koje napuni 21 godinu života naslijedeno oružje ne proda ili daruje, ne podnese zahtjev za registrovanje, onesposobi ili ne predala na uništenje oružje nadležnom organu (član 44. stav (5));
  - ne odjavi oružje koje je prodalo (član 44. stav (6));
  - ne vodi evidenciju o sakupljenom starom oružju i držanju trofejnog oružja (član 64. stav (5));

q) ne prijavi nadležnom organu posjedovanje oružja kategorije C, vazdušnog oružja i električnog paralizatora iz kategorije D (član 76);

(2) Za prekršaj iz stava (1) tački d), e), f), g), i), k), l), m), n) i q) ovog člana izriče se i zaštitna mjera oduzimanja oružja i municije i isprava o oružju i municiji.

## Član 69.

(Novčana kazna od 10.000,00 do 25.000,00 KM i zaštitna mjera za prekršaje pravnog lica i poduzetnika)

(1) Novčanom kaznom od 10.000,00 do 25.000,00 KM kaznit će pravno lice, ako:

- u propisanom roku ne podnese zahtjev za izdavanje odobrenja za držanje oružja (član 22. stav (2));
- ne obavijesti nadležni organ o prodaji oružja i municije u propisanom roku (član 29. stav (2));
- ne obavijesti nadležni organ o prodaji oružja i ne odjavi oružje u propisanom roku (član 29. stav (3));
- osposobi oružje koje je onesposobljeno za upotrebu (član 29. stav 10));
- ne drži i ne čuva oružje i municiju na način da nije dostupno drugim licima, posebno djeci, zaključano i odvojeno u metalnom ormaru, drvenom ormaru, sefu ili sličnom spremištu (član 32. stav (1));
- ne čuva oružje u stambenom ili drugom odgovarajućem prostoru koje se nalazi u mjestu prebivališta, odnosno sjedišta vlasnika oružja (član 32. stav (2));
- izda djeci oružje na upotrebu (član 35. stav (6));
- izda vazdušno oružje ili luk na upotrebu djeci mlađoj od 11 godina na sportskom strelištu ili na drugim mjestima bez nadzora trenera (član 35. stav (7));
- povjeri nošenje oružja i municije fizičkom licu koje ne obavlja poslove zaštite i ne ispunjava uslove iz člana 10. ovog Zakona (član 36. stav (1));
- lovačko i sportsko oružje da na služenje licu koje nema oružni list za tu vrstu oružja (član 37. stav (2));
- streljačka organizacija ili lovačko udruženje da na služenje oružje i municiju licu koje nije član streljačke organizacije ili lovačkog udruženja (član 38. stav (1));
- izda na služenje lovačko oružje i municiju članovima domaćih i inostranih lovačkih

## Hercegovačko-neretvanskog kantona

organizacija, a ne ispunjava sve uslove određene propisima o lovstvu (član 39. stav (1));

m) izda na služenje lovačko oružje i municiju članovima domaćih i inostranih lovačkih organizacija na razdoblje duže od 8 dana (član 39. stav (2));

n) ne obavijesti nadležni organ u roku o izdavanju lovačkog oružja i municije članovima domaćih i inostranih lovačkih organizacija (član 39. stav (3));

o) ne izda potvrdu za nošenje oružja i municije i ne vodi evidenciju (član 39. stav (4));

p) ne obavijesti u roku nadležni organ o prestanku potrebe za dalnjim držanjem oružja i municije (član 40. stav (1));

r) se bavi prometom oružja i municije bez odobrenja nadležnog organa (član 52. stav (1));

s) se bavi popravljanjem i prepravljanjem oružja bez odobrenja nadležnog organa (član 55. stav (1));

t) radi popravljanja i prepravljanja primi oružje za koje nije izdata odgovarajuća isprava (član 56.);

u) bez odobrenja nadležnog organa pusti u rad civilno strelište (član 57. stav (1));

v) na civilnom strelištu da vatreno oružje na korištenje fizičkom licu koje nema odgovarajuću ispravu o oružju (član 58. stav (1));

z) dopusti osobi koja nema odgovarajuću ispravu o oružju da koristi civilno strelište bez nadzora ovlaštene osobe strelišta (član 58. stav (2));

aa) dopusti osobi pod uticajem alkohola i narkotika pristup civilnom strelištu i omogući joj izvođenje gađanja (član 58. stav (3)).

(2) Za prekršaj iz stava (1) tački a), d), e), f), g), i), j), k), l), m), n), o), p), r), s), t), u), v), z) i aa) ovog člana izriče se i zaštitna mjera oduzimanja oružja i municije.

(3) Za prekršaje iz stava (1) ovog člana kaznit će se novčanom kaznom od 2.000,00 KM do 3.000,00 KM odgovorno lice u pravnoj osobi i poduzetnik.

(4) Za prekršaje iz stava (1) ovog člana, uz novčanu kaznu, izriče se i zaštitna mjera zabrane obavljanja djelatnosti prometa, popravljanja i prepravljanja oružja ili vođenja civilnog strelišta, u trajanju od šest mjeseci.

## Član 70.

(Novčana kazna od 5.000,00 do 15.000,00 KM za prekršaje pravnih lica i poduzetnika)

(1) Novčanom kaznom od 5.000,00 KM do 15.000,00 KM kaznit će se pravno lice ako:

- a) odmah po saznanju ne obavijesti nadležni organ o promjeni zdravstvenog stanja vlasnika oružja, a koje može uticati na sposobnost za držanje i nošenje oružja (član 14.);
  - b) u propisanom roku ne vrati odobrenje za nabavljanje oružja (član 21. stav (2));
  - c) bez odobrenja sakuplja i drži staro i trofejno oružje (član 27. stav (1));
  - d) ne prijavi nabavljanje oružja kategorije C, vazdušnog oružja i električnog paralizatora iz kategorije D (član 28. stav (2));
  - e) ne izda potvrdu vlasniku oružja o onesposobljavanju oružja (član 29. stav (7));
  - f) na poziv nadležnog organa ne donese oružje na pregled (član 32. stav (3));
  - g) ne preda dotrajalo oružje koje može ugroziti bezbjednost ljudi, a bez mogućnosti popravka ili prepravka (član 33. stav (1));
  - h) ne preda nadležnom organu zamijenjene tehnički neispravne dijelove (član 33. stav (4));
  - i) ne izda potvrdu fizičkoj osobi kojoj povjerava oružje i o izdatoj potvrdi ne obavijesti nadležni organ (član 36. stav (4));
  - j) streljačka organizacija ili lovačko udruženje ne izda potvrdu za nošenje oružja do strelišta (član 38. stav (2));
  - k) u roku ne prijavi nestanak ili krađu oružja i municije (član 41. stav (1));
  - l) u roku ne prijavi promjenu sjedišta (član 43);
  - m) proda municiju za lovačko oružje s neolučenim cijevima i oružje kategorije C bez odgovarajuće isprave izdate za to oružje (član 54. stav (3));
  - n) ne vodi propisane evidencije (član 64.);
  - o) ne zamijeni u propisanom roku ispravu o oružju (član 75. stav (1));
  - p) ne osigura u propisanom roku uslove smještaja i čuvanja oružja i municije (član 79.).
- (2) Za prekršaj iz stava (1) tački c), d), g), h), n), o) i p) ovog člana, izriče se i zaštitna mjera oduzimanja oružja i municije i isprave o oružju.
- (3) Za prekršaje iz stava (1) ovog člana kaznit će se novčanom kaznom od 1.000 KM do 3.000 KM odgovorno lice u pravnom licu i poduzetnik.

## Član 71.

(Oduzimanje oružja u slučaju vođenja krivičnog ili prekršajnog postupka)

(1) Za krivična djela iz člana 65. te prekršaj iz člana 66., 67., 68., 69., i 70. ovog Zakona, oružje i municija oduzet će se i u slučaju da se postupak dovrši presudom, odnosno rješenjem kojim se okrivljeni ne oglašava krivim ako to zahtijevaju interesi javne ili opće bezbjednosti.

## Hercegovačko-neretvanskog kantona

(2) Nadležni sud, kod kojeg je postupak dovršen, donosi posebno rješenje o oduzimanju oružja i municije iz stava (1) ovog člana.

(3) Po dovršetku postupka provedenog po odredbama člana 65., 69. i 70. ovog Zakona postupa se po rješenju suda.

## DIO TREĆI – PRIJELAZNE I ZAVRŠNE ODREDBE

### Član 72.

(Predaja minsko-eksplozivnih sredstava, oružja i municije)

(1) Fizičko i pravno lice, koje posjeduje minsko-eksplozivna sredstva, oružje i municiju koji su zaostali iz ratnog razdoblja, a koji su Zakonom zabranjeni, može takva minsko-eksplozivna sredstva, oružje i municiju dobrovoljno prijaviti radi predaje nadležnom organu.

(2) Policijski službenik preuzima minsko-eksplozivna sredstva, oružje i municiju iz stava (1) ovog člana, a na mjestu na kome se ono nalazi.

(3) O vrsti i količini predatih minsko-eksplozivnih sredstava, oružja i municije iz stava (2) ovog člana, policijski službenik izdaje odgovarajuću potvrdu.

(4) Nadležni organ je dužan voditi posebnu evidenciju svih primljenih minsko-eksplozivnih sredstava, oružja i municije.

(5) Pod dobrovoljnom predajom minsko-eksplozivnih sredstava, oružja i municije podrazumijeva se fizička predaja minsko-eksplozivnih sredstava i oružja od strane fizičkog lica ili pravnog lica prilikom koje je jasno izražena namjera lica koja ih predaju nadležnom organu, o trajnom ustupanju bez naknade.

(6) Ako protiv lica iz stava (1) ovog člana prije dobrovoljne predaje nije pokrenut krivični postupak, odnosno prekršajni postupak zbog nedopuštenog držanja minsko-eksplozivnih sredstava i oružja, postupak se neće pokrenuti.

### Član 73.

(Legalizacija oružja)

(1) Građani mogu legalizirati oružje za koje nemaju oružni list, a koje se prema ovom Zakonu može registrovati, u skladu sa odlukom o predaji oružja.

(2) Odluku iz stava (1) ovog člana donosi ministar na prijedlog komesara.

(3) Prilikom predaje oružja nadležnom organu, lice iz stava (1) ovog člana mogu podnijeti zahtjev za izdavanje oružnog lista, odnosno odobrenja za držanje trofejnog oružja, ukoliko se za tu vrstu oružja,

u skladu sa ovim Zakonom, može izdati oružni list, odnosno odobrenje za držanje trofejnog oružja.

(4) Do dovršetka postupka po podnesenom zahtjevu iz stava (2) ovog člana oružje se čuva u nadležnom organu.

(5) Oružni list se neće izdati licu koji ne ispunjava uslove iz člana 10. ovog Zakona, kao i kada se predato oružje potražuje od strane policijskih organa.

(6) Ako nakon provedenog postupka licu ne bude izdan oružni list, odnosno odobrenje za držanje trofejnog oružja, oružje se daje na raspolaganje ministarstvu.

### Član 74.

(Podzakonski akti)

(1) Ministar unutrašnjih poslova HNK, na prijedlog komesara, je dužan u roku od šest mjeseci od dana stupanja na snagu ovog Zakona donijeti pravilnike o:

- a) radu Komisije za odlučivanje po podnesenom zahtjevu za nabavljanje i nošenje oružja i municije (član 10. stav (6));
- b) programu obuke i načinu osposobljavanja za pravilno rukovanje, držanje i nošenje oružja (član 15. stav (5));
- c) načinu i uslovima za siguran smještaj i čuvanje oružja i municije (član 17. stav (5), član 32. stav (4) i član 52. stav (4));
- d) obrazac zahtjeva za izdavanje odobrenja za nabavljanje oružja, obrascu, sadržaju obrasče oružnog lista, dozvole za nošenje oružja, obrasca za prijavu i potvrde o prijavljenom oružju i potvrde koju pravna lica izdaju fizičkom licu kojom daju oružje u svrhu zaštite imovine (član 9. stav (2), član 22. stav (5), član 28. stav (7), član 36. stav (5) i član 39. stav (6));
- e) o utvrđivanju uslova i rokova za pregled oružja (član 32. stav (3));
- f) uništenju oružja i municije (član 50. stav (3));
- g) uslovima koje moraju ispunjavati lica registrovana za obavljanje djelatnosti popravljanja i prepravljanja oružja (član 55.);
- h) prostornim i tehničkim uslovima civilnih strelišta (član 57. stav (4));
- i) sadržaju i načinu vođenja evidencija (član 63. stav (3), član 64. stav (7)).

(2) Ministar zdravstva, rada i socijalne zaštite uz saglasnost ministra unutrašnjih poslova dužan je u roku od tri mjeseca od dana stupanja na snagu ovog Zakona donijeti Pravilnik o utvrđivanju zdravstvene sposobnosti za nabavljanje, držanje i nošenje oružja iz člana 13. stav (5).

**Član 75.**

(Zamjena isprava o oružju)

(1) Lica koja u trenutku stupanja na snagu ovog Zakona imaju ispravu o oružju koja je izdata po do sada važećem Zakonu bez obzira na datum njihovog izdavanja dužno je u roku od deset godina, od dana stupanja na snagu ovoga Zakona podnijeti zahtjev za izdavanje nove isprave o oružju.

(2) Postupak iz stava (1) ovog člana provodi se u skladu sa članom 25. ovog Zakona.

(3) Ukoliko lice ne postupi u skladu sa stavom (1) i (2) ovog člana, primjenit će se odredbe člana 46. stav (2) ovog Zakona.

**Član 76.**

(Obaveza prijave oružja)

Fizičko lice koje posjeduje oružje iz člana 28. ovog Zakona, dužno je takvo oružje prijaviti nadležnom organu u roku od 90 dana od dana stupanja na snagu ovog Zakona.

**Član 77.**

(Usklađivanje obavljanja djelatnosti)

(1) Pravno lice i poduzetnik koji obavlja djelatnost prometa oružja i municije, popravljanja i prepravljanja oružja ili vođenje civilnih streljšta, dužno je svoje poslovanje uskladiti s odredbama ovog Zakona u roku od šest mjeseci od dana stupanja na snagu ovog Zakona.

(2) Pravno lice i poduzetnik iz stava (1) ovog člana, koji u roku iz stava (1) ovog člana ne podnese zahtjev ministarstvu s ciljem usklađivanja poslovanja s odredbama ovog Zakona, ministarstvo će rješenjem zabraniti daljnje obavljanje djelatnosti.

**Član 78.**

(Primjena odredbi člana 19. ovog Zakona)

Odredbe člana 19. ovog Zakona ne odnose se na lica koja imaju registrovano oružje prije stupanja na snagu ovog Zakona.

**Član 79.**

(Primjena odredbi člana 32. ovog Zakona)

Pravno i fizičko lice koje posjeduje registrovano vatreno oružje dužno je u roku od godinu dana, od dana stupanja na snagu ovog Zakona, osigurati uslove smještaja i čuvanja oružja i municije u skladu sa članom 32. ovog Zakona.

**Član 80.**

(Primjena Zakona o upravnom postupku F BiH)

Na sva pitanja postupka koja nisu uređena ovim Zakonom primjenjuju se odredbe Zakona o upravnom postupku F BiH.

**Član 81.**

(Rješavanje zahtjeva prije stupanja na snagu ovog Zakona)

Svi postupci koji do dana stupanja na snagu ovog Zakona nisu pravosnažno dovršeni, završit će se po odredbama ovog Zakona.

**Član 82.**

(Stavljanje van snage)

Danom stupanja na snagu ovog Zakona stavlja se van snage Zakon o nabavljanju, držanju i nošenju oružja i municije („Službene novine HNK“ br. 3/2000 i 11/2008).

**Član 83.**

(Stupanje na snagu)

Ovaj Zakon stupa na snagu osmog dana od dana objavljivanja u „Službenim novinama Hercegovačko-neretvanskog kantona“.

Bosna i Hercegovina  
Federacija Bosne i Hercegovine  
Hercegovačko-neretvanski kanton  
S K U P Š T I N A

Broj: 02-01-XXV-131/17  
Mostar, 04.05.2017. godine

**P R E D S J E D A V A J U Ć I**  
Šerif Špago,s.r.

**194**

Na osnovu člana 46. Poslovnika Skupštine Hercegovačko-neretvanskog kantona („Službene novine HNK“, br. 2/05), na prijedlog Kolegija Skupštine Hercegovačko-neretvanskog kantona, Skupština Hercegovačko-neretvanskog kantona, na sjednici održanoj dana 04.05.2017. godine, donosi

**PROGRAM RADA  
SKUPŠTINE HERCEGOVAČKO-  
NERETVANSKOG KANTONA ZA 2017.  
GODINU**

**I UVOD**

Programom rada Skupštine Hercegovačko-neretvanskog kantona (u daljem tekstu Skupštine HNK) za 2017. godinu utvrđeni su ciljevi i zadaci koje će Skupština HNK ostvarivati u okviru svojih ustavnih i zakonskih nadležnosti, obuhvaćeni su najznačajniji propisi i druga akta koja će Skupština